



Ciq Ngaenz

□ Vangz Gveiyangh / 黄桂香

Siujfanz mbouj dwg gij hagseng ndaw ban gou, hoeng caeuq gou gig ndei.

Hainduj dou cungj mbouj roxnaj, miz baez he gangj goq, de haemq maij dingq gou hwnjdangz, ndigah roengz-dangz le daegdaengq daeuj ra gou gangj vah, caemhcaiq aeu gij hauhmax gou.

Hoeng Siujfanz yinxhwnj gou louzsim, dwg aenvih de ciengzseiz bae bangunghsiz “guh hek”, song sam ngoenz couh deng banhcujiyin cingj daeuj bangunghsiz. De dwg boux ngwn he, caih banhcujiyin de ndei gangj rwix gangj, de mbouj siengj haibak couhwdg mbouj gangj saek coenz, banhcujiyin de ciengz deng de gik ndaej gangj mbouj ok vah daeuj.

Miz ngoenz ndeu, Siujfanz gingqyienz doengh fwngz dub boux lwgsai beij de lij sang hubcap ndeu, aen ndaeng lwgsai lae lwed mbouj dingz, gwnz naj lij miz giz sieng hung’ iq dem. Daxmeh lwgsai huj-dengdeng ganj daengz hagdangz, iugouz Siujfanz boiz 300 maenz cienzyw. Daxmeh Siujfanz youq mwh de lij iq couh gvaqseiq lo, daxboh youq baihrog dajgoeng, de caeuq daxgoeng daxbuz song bouxlaux gvaq saedceij ndwi. Baenzneix banh-cujiyin de cij ndei cingj daxgoeng de gaeng ndaej 80 lai bi haenx daeuj hagdangz. Daxgoeng Siujfanz rox gienh saeh neix le, hozndat ndaej gangj mbouj ok vah daeuj, fid fwngz couh deuz lo.

Mbouj miz banhfap, Siujfanz daj dienhvah hawj daxboh de, siengj mbouj daengz daxboh de baez ndaej-nyi hix hozndat ndaej gven’ gvak dienhvah bae. Mbatneix, Siujfanz simvueng lo, hoeng de lij caemding naeuz: “Cienz gou itdingh hawj, hawj gou di seizgan.” Ginggvaq banhcujiyin naihsim hezdiuz, daxmeh lwgsai dauqdaej cengqgengz doengzeiq lo.

Gou dingqnyi gienh saeh neix le, daegdaengq ra Siujfanz, cam de baenzlawz guh. Siujfanz naeuz: “Gou menhmenh gip bingsuliu rom baenz boengj bae gai canh cienz, maenz ngaenz he maenz ngaenz he rom.” Gou

roxnyinh de gangj vah mbouj miz rengz geijlai lo, sing hix mbouj lumj gaxgonq baenzneix hung.

“Mwngz gamj rapdawz cwzyin, di neix lauxsae aeu haenh mwngz. Hoeng, gij beizheiq mwngz gvaqlaeng aeu gaij, mbouj ndaej gangj mbouj hab’ eiq couh doenghfwngz.” Gangj sat, gou daj ndaw daeh dawz ok 300 maenz ngaenz hawj de, naeuz: “Gij cienz neix lauxsae sien ciq hawj mwngz, mwngz baezlaeng menhmenh boiz gou couh ndaej lo.”

Aiq de liuh mbouj daengz gou rox ciq cienz hawj de, de doeksaet ngawh youq gizde, doeklaeng sing iq naeuz:

“Gyo’ mbaiq Vangz lauxsae, gij cienz neix gou itdingh boiz mwngz!”

Aenvih gienh saeh neix, dou doxliz gyawj le haujlai, gou seizseiz haeujsim de hag ndaej baenzlawz yiengh, de hix ciengzseiz ra gou gangjgoj.

Miz ngoenz ndeu, banhcujiyin de angqvauvau naeuz gou nyi, ngoenz-lwenz cuengqhag le, gyoengq doengz-hag cungj baema lo, de gingqyienz raen Siujfanz boux dog nyinhcaen baet gyausiz, caen roxsoq lai lo. Neix dwg banhcujiyin de baez daih’ it youq ndaw bangunghsiz haenh de bw!

Gou dawz gij vah banhcujiyin de gangj hawj Siujfanz dingq caez, caemhcaiq doiq de daengj mehfwngz. De miz di najmong naeuz: “Vangz lauxsae mwngz baenzneix haeujsim gou, gou hix wnggai guh ndei di, mbouj hawj mwngz vih gou yousim lai!”

Gou caen yawjraen maqmuengh dahraix, baez he haenh, Siujfanz couh ndaej gujli, doeklaeng de menhmenh

gaijndei, mbouj luenh caeuq doengz-hag doxceng doxmoeb lo. Siujfanz miz cinbu, gyoengqdou guh lauxsae cungj yawj youq ndaw da, ndawsim van lumj gwn dangzrwi nei.

Ngoenzde ciet lauxsae, Siujfanz daegdaengq soengq mbaw hohgaj caeuq fung saenq ndeu hawj gou, gou sim’ angq fouzbeij. Gwnz hohgaj sij miz coenz vah neix ndeu——“Youq ndawsim gou, mwngz couh lumj daxmeh gou nei, cingj saenq gou, doeklaeng gou itdingh mbouj hawj mwngz saetmuengh.” Gaxgonq de lij dwg boux lwgnyez manz, seizneix gingqyienz gangj ok gij vah yienghneix daeuj, ndawsim gou fwt roxnyinh ndawsim raeujrubrub.

Gou ngeix: Gawqyienz ndaw hohgaj sij miz vah lo, baenzneix ndaw byuksaenq wnggai mbouj dwg sij miz saenq hawj gou luba, mbouj rox miz maz youq ndaw. Gou yaengyaeng hai byuksaenq, ndawde dwg dab ngaenz-lingz ndeu, cingqngamj dwg 300 maenz.

Gienq Lwg Bae Doegsaw

□ Vangz Civeij / 黄志伟

Meh:

Ciengx lwg baenz lai geq,
Mbouj rox meh sinhoj.
Meh ngoenzngoenz hwnj bo,
Mbouj rox ngeix aencingz.

Meh:

Lwg ngoenzngoenz youq ranz,
Gwn van caiq gwn rang.
Noh cawj daengz ndaw banz,
Lij damz gwn mbouj feih.

Lwg:

Lwg ndaej 15 bei(bi),
Rox ngeix daengz bohmeih.
Seizneix lwg caengz geq,
Deq bauqaen lij caeux.

Meh:

Lauxsae boq aen sauq,
Meh dauq ranz cix daej.
Ranzhag lwg mbouj bae,
Meh daej lumj fwn roengz.

Lwg:

Lwg mbouj bae doegsaw,
Ok haw caemh mbouj loek.
Lwg ra ngaenz guh goek,

Boek ndang guh gaicawx.

Meh:

Duz roeg ngamq hwnj bwn,
Lij caengz dumh aen hwet.
Roeg iq mbouj miz fwed,
Ndaej buet geijlai nanz?

Lwg:

Ngeix bae daengz ranzhag,
Lumj vunzbag gvaq ngoenz.
Aen ukgyaeuj mbouj doeng,
Loeng yungh cienz bohmeih.

Meh:

Meh mbouj ndaej doegsaw,
Ok haw deng vunz lox.
Cawx song gaen faen ho,
Vunz lox gwn geij liengz.

Lwg:

Raen meh gangj yienghneix,
Ngeix daengz sim couh diuq.
Lwg mbouj rox suenq ciuh,
Liuu langh mbouj doegsaw.

Meh:

Cihshaw dij lumj gim,



Sim gou in daengx ciuh.
Hai daeng le sim diuq,
Da liuq saw mbouj rox.

Lwg:

Geij ngoenz raen meh daej,
Simsaeh naek lailai.
Cungj dwg lwg mbouj gvai,
Haih hawj meh simfanz.

Meh:

Meh gangj lwg aeu dingq,
It dingh bae doegsaw.
Yienghyiengh geiq youq ndaw,
Ngoenzlawz bae ranzhag.

Lwg:

Bohmeih sou cuengqsim,
Gou rim geiz couh dauq.
3 bi gou gauhgauj,
Bauqheij daengz ndawranz.

“Yawj bingh dwk yw!” Coenz vah neix hawj Lungz Byauh singj lo, de roxnyinh daxmeh gangj ndaej deng, wnggai bae yawj bingh dwk yw, simnyap cij ndaej sanq.

Baenzneix, de youh ra roen byaij le geij leix, dauqcungz daeuj daengz aen mbanj henz dah haenx.

De daengz laj gorungz ngoenzde raen dahsau guhsaeg haenx, raemxdah laelek, ndaek rin ciuqgaeuq, cij dwg ngauez vunz gaenq fouz, dan lw gij ngauez Lungz Byauh gyaxgedged ingj youq ndaw raemxdah heuswd-swd.

“Ngoenzde de couh youq henz ndaek rin neix guhsaeg.” Lungz Byauh gag nam byaij daengz henz ndaek rin

·Sawcuenhraez Lwngnyez·

Gij Golwngnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

haenx, iet fwngz maeuq roengzbae bued raemxdah, youq ndaw uk dauq- ngeix geij ngoenz gonq youq gizneix baez daih’ it raen dahsau haenx.

Youq henz dah maeuq le yaep he, de roxnyinh gig mbwq, youh cienq ndang hwnj haenzdah, daeuj daengz bakdou aen ranzcieen dahsau haenx,

baedauq byaij le geij baez, vanzlij mbouj ndaej yawjraen gij ngauez de, youh mbouj ndei gwq ndwn youq rog dou, engq mbouj gamj seizbienh damq haeuj ndaw dou. Duz ma hung cimyawj de, cijaeu de caiq byaij yamq ndeu, aiq couh yaek yat coemj de.

Miz boux lwgsai he daj ndawranz

buet okdaej, nyaeuq bwnda cimyawj de.

De miz di simhaw, vuengmuengz byaij deuz, boux lwgsai haenx ndwn youq bakroen, itcig yawj de byaij, de byaij ndaej gig gyae le lij ndwn youq gizhaenx gamyawj.

(caengz sat)